

## **BASES DE SUBVENCIONES A CLUBS DEPORTIVOS DA PROVINCIA DE PONTEVEDRA PARA O DEPORTE NÁUTICO (REMO/VELA/PIRAGÜISMO) DO ANO 2019**

Entre as competencias atribuídas pola lexislación de réxime local ás deputacións atópase a cooperación no fomento do desenvolvemento económico e social do territorio provincial. O deporte constitúe unha actividade que incrementa a cohesión social, motivo polo cal se considera que o impulso provincial á oferta deportiva e o fomento do tecido asociativo deportivo potencian a práctica do deporte e tamén o desenvolvemento local.

### **Primeira. Obxecto**

A través destas bases réxense as subvencións para o apoio a clubs deportivos federados de deporte náutico na temporada deportiva 2018-2019 e, no seu caso, na temporada 2019.

Esta convocatoria destinada a clubs federados da provincia de Pontevedra ten como obxectivo específico apoiar a súa participación en ligas e competicións oficiais de ámbito provincial, autonómico ou nacional, convocadas por federacións deportivas galegas ou nacionais.

A través deste ámbito de actuación preténdese colaborar coa iniciativa privada no cumprimento dos fins que lle son propios, co obxecto de fomentar a cohesión do territorio e a igualdade de oportunidades en materia de deportes, independentemente das condicións persoais de cada cidadá e cidadán e do lugar da provincia onde resida.

### **Segunda. Dotación e imputación orzamentaria**

A concesión das subvencións farase con cargo ao Orzamento da Deputación de Pontevedra para o ano 2019, en concreto con cargo á aplicación orzamentaria

19/340.3410.489.22, deportes náuticos (remo, vela e piragüismo), cun importe total de cincocentos mil (500.000,00) euros e coa seguinte distribución:

Materia	Programa	Importe	Aplicación orzamentaria
Deportes	Náuticos: piragüismo	270.000,00 €	19/340.3410.489.22
Deportes	Náuticos: remo	150.000,00 €	19/340.3410.489.22
Deportes	Náuticos: vela	80.000,00 €	19/340.3410.489.22

O orzamento de 500.000,00 € inicial poderá ser ampliado segundo dispoñibilidade orzamentaria ata un máximo de 100.000,00 €

Por causas técnico-deportivas debidamente xustificadas e en base ao número de solicitudes presentadas a comisión de valoración terá a posibilidade de minorar ou aumentar as cantidades entre as distintas modalidades obxecto desta convocatoria.

### Terceira. Gastos subvencionables

Os gastos subvencionables serán unicamente os de carácter corrente e os de adquisición de materiais funxibles xerados pola realización da actividade subvencionada. Non serán obxecto de subvención os seguintes:

- Eventos deportivos singulares que poidan ser obxecto de subvención a través doutras convocatorias
- Gastos derivados das atencións protocolarias ou de viaxes de ocio dos clubs beneficiarios
- Gastos financeiros
- IVE, no caso de que este sexa deducible

### Cuarta. Entidades beneficiarias

Poderán optar a estas subvencións os clubs deportivos federados que cumpran cos seguintes requisitos:

- ✓ Carecer de fins de lucro
- ✓ Estar ao corrente coas obrigas tributarias da Axencia Estatal Tributaria, coa Facenda galega, coa Seguridade Social e coa Deputación, e non ter obrigas ou incumprimentos pendentes, de calquera tipo e non só económicos, coa Deputación
- ✓ Ter a modalidade practicada polos clubs deportivos federados implantación na provincia de Pontevedra
- ✓ Estar inscritos no Rexistro de asociacións deportivas da Secretaría Xeral para o Deporte
- ✓ Non estar incursos en ningún dos supostos de incapacidade ou incompatibilidade para a percepción de axudas ou subvencións públicas nin en ningunha das prohibicións para percibir subvencións recollidas na lei

Non poderán beneficiarse destas subvencións os clubs deportivos que teñan pendentes de xustificar subvencións concedidas no ano 2018 para o mesmo programa.

#### **Quinta. Lugar e prazo de presentación de solicitudes**

Cada club poderá presentar unha única solicitude dunha modalidade deportiva concreta. Esta convocatoria é incompatible con outras liñas de subvención que fagan fronte aos mesmos gastos anuais do club en 2019 (deporte federado de ámbito inferior a nacional e de ámbito nacional).

As solicitudes presentaranse obrigatoriamente por vía electrónica a través do formulario normalizado dispoñible na sede electrónica da Deputación de Pontevedra (<https://sede.depo.gal>), de acordo co establecido no artigo 14.2 da Lei 39/2015, de 1 de outubro, do procedemento administrativo común das administracións públicas (LPACAP).

En caso de presentar a solicitude de forma presencial requiriráselle que a emende mediante a presentación electrónica. Para estes efectos considerárase como data de presentación da solicitude aquela na que se realizara a emenda.

Para a presentación das solicitudes a sede electrónica da Deputación de Pontevedra admite os certificados electrónicos do sistema Cl@ve, que contempla a utilización de sistemas de identificación baseados en claves concertadas (sistemas de usuario e contrasinal) e certificados electrónicos (incluído o DNle).

O prazo de presentación de solicitudes será de 1 mes, contado a partir do día seguinte ao da publicación das bases da convocatoria e do extracto no *Boletín Oficial da Provincia de Pontevedra* (BOPPO).

### **Sexta. Comprobación de datos**

Para a tramitación deste procedemento consultarase automaticamente os datos incluídos nos documentos elaborados polas administracións públicas que se detallan a continuación:

- NIF das persoas xurídicas solicitantes
- DNI ou NIE da persoa representante legal do club
- Certificado de estar ao corrente das obrigas tributarias coa Axencia Estatal de Administración Tributaria (AEAT)
- Certificado de estar ao corrente das obrigas tributarias coa Facenda autonómica da Xunta de Galicia (ATRIGA)
- Certificado de estar ao corrente do pagamento da Seguridade Social

En caso de que as persoas interesadas se opoñan ás devanditas consultas deberán indicalo no cadro correspondente habilitado no formulario de inicio e achegar os documentos correspondentes.

No suposto de imposibilidade material de obter o documento o órgano competente poderá requirirlle á persoa interesada a súa presentación ou, no seu defecto, a acreditación por outros medios dos requisitos aos que se refire o documento, con anterioridade á formulación da proposta de resolución.

## Sétima. Documentación

As entidades solicitantes deberán achegar coa solicitude a seguinte documentación:

- Orzamento estimativo de gastos subvencionables por esta convocatoria (base terceira), asinado e referido á modalidade deportiva correspondente á temporada 2018-2019 e, no caso dos clubs que participen en competicións de ano natural, á temporada 2019. No caso dos clubs que marquen na solicitude que deducen o IVE deberán presentar os gastos sen el.

- Certificación expedida pola federación correspondente na que se detallen os criterios de valoración específicos e previstos no cadro da base 10.<sup>a</sup> destas bases (excepto a memoria e o orzamento). Excepcionalmente, aqueles clubs de modalidades deportivas que se desenvolvan durante o ano natural deberán presentar o certificado da federación correspondente ao ano 2018. En caso de que non se poida presentar o mencionado certificado a persoa representante legal do club deberá achegar unha declaración xurada cos datos reflectidos na base 7.<sup>a</sup> desta convocatoria para competir no referido ano; no momento da xustificación deberá presentar inescusablemente o certificado da federación correspondente.

- Memoria técnico-deportiva do club na que se especifiquen os resultados da temporada anterior (2018 ou 2017-2018) e os meses que dura a temporada actual en caso de non ser por ano natural.

A documentación complementaria deberá presentarse electronicamente. As persoas interesadas responsabilizaranse da veracidade dos documentos que presenten. Excepcionalmente a Administración poderá requirir a exhibición do documento orixinal para o cotexo da copia electrónica presentada.

Se algunha das persoas interesadas presenta a documentación complementaria presencialmente requiriráselle que a emende a través da súa presentación electrónica.

Para estes efectos considerárase como data de presentación aquela na que se realizase a emenda.

#### **Oitava. Publicacións de actos**

Publicaranse no BOPPO, de conformidade co establecido no artigo 45 da LPACAP, as entidades incluídas e excluídas.

Así mesmo, serán igualmente obxecto de publicidade a través da páxina web da Deputación de Pontevedra.

#### **Novena. Trámites administrativos posteriores á presentación de solicitudes e emenda destas**

Todos os trámites administrativos que as entidades interesadas deban realizar durante a tramitación deste procedemento deberán efectualos electronicamente a través do modelo "instancia xenérica", dispoñible en <https://sede.depo.gal>.

En caso de que a solicitude non reúna os datos esixidos ou calquera dos previstos no artigo 66 da LPACAP requiriráselle ao interesado que no prazo de 10 días hábiles emende as faltas ou presente os documentos preceptivos, indicándolle que, en caso de non facelo, se terá por desistida a súa petición, que se arquivará sen máis trámites.

#### **Décima. Procedemento de concesión e criterios de valoración**

A concesión das subvencións realizarase en réxime de concorrencia competitiva, tendo en conta para a adxudicación destas os seguintes criterios:

CRITERIOS DE VALORACIÓN ESPECÍFICOS	PUNTUACIÓN	PONDERACIÓN
Número de licenzas federativas	0-20	20 %
Ámbito de competición do club (provincial, autonómico ou nacional)	0-20	20 %
Memoria técnico-deportiva do club na que se especifiquen os resultados da temporada anterior	0-20	20 %
Número de equipos participantes por categoría na actual temporada	0-10	10 %
Clubs que compitan con licenzas masculinas e femininas	0-10	10 %
Clubs que compitan con licenzas de deporte adaptado	0-10	10 %
Orzamento de gastos do club	0-10	10 %

A concesión destas subvencións é compatible con outras que se reciban para o mesmo fin, sempre que o conxunto de todas elas en ningún caso supere o 100 % do orzamento que presente o club.

#### **Décimo primeira. Instrución do procedemento**

A instrución do procedemento de concesión de subvencións correspóndelle ao xefe do Servizo de Deportes, quen realizará de oficio todas as actuacións que estime necesarias para a determinación, o coñecemento e a comprobación dos datos, en virtude dos cales fará un informe-proposta no que figure a valoración das solicitudes segundo os criterios sinalados na base 7.<sup>a</sup> e explique o sistema seguido, de conformidade co previsto no artigo 19 da Ordenanza xeral de subvencións da Deputación de Pontevedra e no artigo 24 da Lei 38/2003, de 17 de novembro, xeral de subvencións (LXS).

Informe de fiscalización do Servizo de Intervención de todos os expedientes e do informe-proposta.

Posteriormente a comisión de valoración das solicitudes de subvención realizará un estudo do informe-proposta do xefe do servizo. Este órgano colegiado estará composto por:

- ❖ Presidenta: a deputada delegada da área de Deportes
- ❖ Vogais: dous membros do persoal técnico do Servizo de Deportes e un do persoal técnico do Servizo de Intervención
- ❖ Secretaria ou secretario: unha ou un funcionario do Servizo de Deportes, que actuará sen voto

A comisión de valoración poderá:

- Obter cantos informes estime necesarios para resolver
- Emitir un informe a respecto das solicitudes de subvención

A concesión das subvencións levarase a cabo a través do procedemento de concorrencia competitiva establecido no artigo 22.1 da LXS.

As propostas de concesión de subvencións someteranse á aprobación do órgano competente.

O acto de resolución do procedemento será obxecto de publicación e terá os efectos dunha notificación, por tratarse dun procedemento de concorrencia competitiva (artigo 45 da LPACAP).

Logo de transcorridos seis meses a partir do día seguinte a aquel no que remate o prazo de presentación da solicitude sen notificar a resolución as e os interesados estarán lexitimados para entender como desestimada por silencio administrativo a solicitude de subvención.

### **Décimo segunda. Xustificación e pagamento**

Unha vez notificadas as subvencións concedidas os clubs beneficiarios deberán xustificalas da seguinte maneira:

- Se a modalidade deportiva se corresponde coa temporada 2018-2019 xustificaranse dentro dos 3 meses seguintes desde que remate a temporada e, en todo caso, antes do 31 de decembro de 2019

- Se a modalidade deportiva se corresponde coa temporada 2019 (ano natural) xustificaranse antes do 31 de marzo de 2020

Para cobrar a subvención as entidades deberán presentar a seguinte documentación obrigatoriamente por medios electrónicos a través do modelo "instancia xenérica", dispoñible en <https://sede.depo.gal>:

- a) Conta xustificativa na que se relacionarán os conceptos de gastos por importe igual ou superior á subvención concedida pola Deputación, mais as axudas solicitadas e recibidas doutras administracións públicas, tal como se establece no artigo 24.1.B.f.) da Ordenanza xeral de subvencións
- b) Toma de razón na contabilidade do club deportivo (modelo 340.005)
- c) Unha memoria de actuación xustificativa do cumprimento da subvención outorgada na que se indiquen as actividades realizadas e os resultados obtidos durante a temporada
- d) Os clubs aos que se lles outorguen subvencións deberán acreditar a difusión do financiamento a través de calquera medio probatorio (prensa, valos, pancartas, vestimenta deportiva, páxina web, fotografías...) e, no caso de máis de seis mil (6.000,00) euros deberán acreditar, ademais, a divulgación do financiamento a través de fotografías nas instalacións e na súa vestimenta
- e) Orixinais ou copias cotexadas de facturas ou documentos análogos con valor probatorio no ámbito mercantil e administrativo polo importe da subvención concedida, indicando en cada factura o número de unidades, os prezos unitarios e o prezo total de cada unidade
- f) Os clubs que acheguen unha declaración xurada cos datos reflectidos na base décima deberán acreditar inescusablemente o certificado da federación correspondente

Para pagar a subvención terase en conta o seguinte:

- En caso de que se xustifiquen gastos polo 100 % do orzamento subvencionado, aboarase a totalidade da subvención
- En caso de que se xustifiquen gastos inferiores ao 100 %, aboarase a parte proporcional da subvención

- A desviación máxima no custo dos diferentes conceptos da actividade subvencionada con respecto ao orzamento inicial pormenorizado non poderá superar o 20 %

O pagamento efectuarase mediante unha transferencia bancaria á conta sinalada polo club.

Os gastos que figuren na conta xustificativa aboaránselles ás entidades beneficiarias preferiblemente antes da presentación da xustificación da subvención pero, en todo caso, no prazo máximo dun mes desde a percepción dos fondos. O gasto non pagado ou pagado fóra de prazo non se considerará subvencionable.

Os clubs beneficiarios das subvencións provinciais deben empregar, con carácter xeral, formas de pagamento a terceiros que poidan acreditarse mediante un documento expedido por unha entidade financeira no que queden identificados o club beneficiario, o importe e a data de pagamento (tarxetas bancarias de crédito ou débito, talóns nominativos, transferencias bancarias etc.), e só excepcionalmente poderá empregarse o pagamento en metálico cando non sexa posible outra forma alternativa. O incumprimento desta disposición para algún gasto que supere o importe de novecentos (900,00) euros implicará que este se considere non subvencionable.

No caso de clubs que non teñan contabilidade, os gastos que non se paguen mediante unha entidade financeira non se considerarán subvencionables.

Para cobrar a subvención os clubs deberán estar ao corrente das súas obrigas tributarias coa Axencia Estatal Tributaria, coa Facenda galega, coa Seguridade Social e coa Deputación.

### **Décimo terceira. Obrigas das entidades beneficiarias**

As entidades beneficiarias de subvencións concedidas con cargo ao Orzamento provincial teñen as seguintes obrigas:

- 1) Cumprir o obxectivo, executar o proxecto, realizar a actividade ou adoptar o comportamento que fundamenta a concesión das subvencións
- 2) Xustificar o cumprimento dos requisitos e condicións, así como a realización da actividade e o cumprimento da finalidade que determinen a concesión da subvención. O prazo para realizar a actividade subvencionada será, para a temporada 2018-2019, ata o final desta, e, no caso da temporada 2019, ata o 31 de decembro de 2019
- 3) Someterse ás actuacións de comprobación que efectuará o órgano concedente, así como a calquera outras de comprobación e control financeiro que poidan realizar os órganos competentes, achegando tanta información lles sexa requirida no exercicio das actuacións anteriores
- 4) Dispoñer dos libros contables, os rexistros dilixenciados e os demais documentos debidamente auditados nos termos esixidos pola lexislación mercantil e sectorial aplicable ao beneficiario en cada caso, así como de cantos estados contables e rexistros específicos se esixan nas bases reguladoras das subvencións, coa finalidade de garantir o adecuado exercicio das facultades de comprobación e control
- 5) Conservar os documentos xustificativos da aplicación dada aos fondos recibidos, incluídos os documentos electrónicos, en tanto poidan ser obxecto das actuacións de comprobación e control

Os logotipos oficiais que se deben inserir están dispoñibles en [www.depo.gal](http://www.depo.gal) (área de descargas/imaxe corporativa).

#### **Décimo cuarta. Incumplimento**

Unha vez vencido o prazo de xustificación sinalado nestas bases ou, no seu caso, o establecido na prórroga sen que o club beneficiario presentase a documentación xustificativa o Servizo de Deportes requiriralle que a presente no prazo improrrogable de quince días.

O feito de non presentar a documentación neste prazo suporá a perda da subvención e as demais responsabilidades previstas na LXS.

#### **Décimo quinta. Devolución e reintegro**

As subvencións concedidas deberán ser devoltas ou reintegradas, entre outros, polos seguintes motivos:

- Obtelas falseando as condicións requiridas
- Non aplicalas aos fins para os que foron concedidas
- Incumprir a entidade beneficiaria as obrigas asumidas e as condicións fixadas nestas bases

#### **Décimo sexta. Órgano de aprobación**

De acordo co establecido na base 16.2 das Bases de execución do Orzamento para o ano 2019 e cumprindo o establecido no artigo 18 da LXS, o órgano competente para a aprobación destas bases é a Xunta de Goberno.

#### **Décimo sétima. Normativa aplicable**

As subvencións que outorgue a Deputación rexeranse, ademais de por estas bases, pola seguinte normativa:

- LXS, nos artigos de carácter básico e na súa normativa tamén básica de desenvolvemento
- Lei de subvencións de Galicia e a súa normativa de desenvolvemento
- Artigos non básicos da LXS e normativa básica de desenvolvemento
- Lexislación de réxime local, estatal e autonómico
- Ordenanza xeral de subvencións da Deputación
- Bases de execución do Orzamento
- Actos administrativos ditados polos distintos órganos da Deputación

### **Décimo oitava. Recursos**

Contra estas bases e as resolucións administrativas que se adopten na súa execución poderá interpoñerse, no prazo dun mes, un recurso de reposición perante o órgano que as ditou, que se entenderá como desestimado se transcorre este período sen recibir resposta. Neste caso poderá interpoñerse un recurso contencioso-administrativo no prazo de dous meses ante o Xulgado do Contencioso-Administrativo, como se prevé no artigo 8 da Lei 29/1998, de 13 de xullo, da xurisdición contencioso-administrativa. Contra esta resolución tamén se poderá interpoñer directamente un recurso contencioso-administrativo no prazo indicado.

En todos os casos os prazos contaránse a partir do día seguinte ao da recepción da correspondente notificación ou da data na que o recurso de reposición se entenda como desestimado.

### **Décimo novena. Publicidade da convocatoria**

Estas bases reguladoras publicaranse no BOPPO e en <https://sede.depo.gal>.

Por outra parte, de conformidade co previsto nos artigos 17.3.b) e 20.8.a) da LXS, remitirase o texto da convocatoria á Base de Datos Nacional de Subvencións (BDNS) para a súa publicación nela, que será a que lle dea traslado do seu extracto ao BOPPO.

### **Vixésima. Protección de datos**

Os datos persoais obtidos neste procedemento serán obxecto de tratamento pola Deputación de Pontevedra, en calidade de órgano responsable, coa finalidade de xestionar este procedemento, verificar os datos e documentos que a persoa interesada declare na súa solicitude para comprobar a súa exactitude e levar a cabo todas as actuacións administrativas que, no seu caso, deriven.

A lexitimación para o tratamento basease no cumprimento dunha tarefa en interese público ou o exercicio de poderes públicos segundo as normas de rango legal recollidas no apartado "normativa aplicable", dispoñible na ficha do procedemento en <https://sede.depo.gal>.

Os datos persoais obtidos neste procedemento serán obxecto de comunicación ás administracións públicas no exercicio das súas propias competencias ou cando sexa necesario para que a cidadanía poida acceder de forma integral á información relativa a unha materia e ao público xeral dada a publicación de actos prevista.

As persoas interesadas poderán acceder, rectificar e suprimir os seus datos, así como exercitar outros dereitos ou revogar o consentimento segundo o previsto en <https://depo.gal/proteccion-de-datos/exercicio-de-dereitos>.